

Bäärg und Tal

*Wenn ich ä Bäärg wee und du äs Tal
Wer hetti ächt mee Chraft?
Wer gschpirti ächt mee Himmil?
Wer geit mee in i Teiffi
Wer isch neechär an är Ewigkeit?*

Gloria

*Ich gsee d Sunnu voll Müsig und Wolkä voll Kläng,
gschpiru z Wättär voll Rhythmus, där Wind voll va
Gsäng.
Ich gsee d Mattä voll Blüomä, keeru d Vegil im
Wald.
Z Heww schmäckt nach Summä, so bunt hesch Du
gmaalt.
Das bringt mich zum Singu
Biwiist: DU bisch daa - Gloria
Ich will zrugg cho in z Ächta, will gschpiru und gsee.
So vill Wunnär ooni Bildschirm und z Wenigär wird
mee.
Das bringt mich zum Stüünu
Biwiist: Du bisch daa – Gloria*

Heilig

*Du chasch heilu. Chrank isch d Wäält
Du chasch heilu. Chrank macht z Gääld
Heilig, Heilig - d Seensucht isch grooss
nach Heilig, Heilig im Chopf und im Schooss.
Heilig, Heilig, grooss isch där Schmäärz.
Heilig, Heilig, fär d Händ und fär z Häärz.
Du bisch daa, bidingigsloos
Du bisch daa - mal chlei, mal grooss.*

Därnaa

*Cho und gaa – loiffu und staa.
Und was chunnt därnaa?
Z Beschta drus machu – läbu und lachu.
Und was chunnt därnaa?
Durch Freid und Leid änand gitreit.
Und was chunnt därnaa?
Vill wäärtvulli Ziit – gnuzt odär nid?
Und was chunnt därnaa?
Där Rägu und d Sunnu im Läbu gfunnu.
Und was chunnt därnaa?
Falsch odär richtig? z Büüchgfüül isch wichtig.*

Äs tüot mär leid

*Woort - so schnäll sindsch gseit.
Nur güot gmeint und gliich vāretzt, äs tüot mär leid.
Händ - vill gschafft, kei Freid.
Ä hüüffu Gääld und gliich so arm, äs tüot mär leid.
Schritt- wiä schnäll das geit.
Uf änand züo und gliich vārbii, äs tüot mär leid.*

Zwischu dri

*Än Afang – äs Ändi - und ich zwischu-dri
Himmil und Äärdu - äbrüüf und äbri
Dur oder Moll - miini Läbunsmelodii
Hoch und Teif - vārlooru zwischu-dri.

Und wenn ich singu, bisch Du miinä Schnüüf.
Und wenn ich kiju, steisch Du mit miär üüf.
Und wenn ich lachu, hesch Du mit miär Freid.
Und bin ich am Ändi, weisch Du, wiä s wiitäreit.*

Häärz wärts

*Hesch du scho keert, wiä d Stilli cha klingu?
Hesch du scho gschpirt, wiä d Wällu cha schwingu?
Hesch du scho gsee, was än Trickär cha bringu
häärzwärts in Richtig Fridu?
Genau DU bisch gmeint!
Genau HIÄ isch diinä Platz!
Genau JETZ isch Ziit!
Häärz wärts geit nid wiit.*

*Und wenn Du geisch, cha das doch nid fär immär sii.
Wa Du steisch, sii wiär doch grad no zämu gsi.
Was Du gseit hesch, das klingt im Häärz no naa
und all die Liädär, di bliibunt immär da.*

